

## Ա.

Հարիւրեւոթ տարի է, որ մենք Հայերս էլ ունինք մեր պարբերական մամուլը, որի ներկայացուցիչները աշխատել և գործել են այնչափ, որչափ որ շրջապատող հանգամանքներն ու պարագաները ներել են: Նրանք դարթեցրել են զանազան խնդիրներ, որոնցից ոմանք՝ այսպէս կամ այնպէս ստացել են իրենց լուծումը, իսկ ոմանք էլ տրուել են մոռացութեան: Մոռացութեան և անուշադրութեան մատնուած խնդիրներից մինն էլ այն է, որ մենք Հայերս երբէք ծանօթութիւն չունինք մեր երկրի ազգաբնակչութեանց տեղագրութեան և զանազան ժողովուրդների վարք ու բարքի, նիստ ու կացի, ազգային ինքնուրոյն առանձնայատկութիւնների և սովորութիւնների հետ: Մեր երկրի զանազան ազգերի առանձնայատկութիւնների, նրանց լեզուի, կրօնի և ազգային սովորութիւնների մասին մենք միշտ օտար ազբիւրներից ենք տեղեկութիւններ քաղում, որոնք շատ անգամ սխալ և անստոյգ են լինում: Այն ինչ մեր երկրի բանիմաց, հասկացող և ին-